



Selasa, 28 November 2023
Ogen: LUKAS 12:13-15



Kegeluhen Si Tuhu-Tuhu



Genduari enda kita nggo biasa kal ngidah kurir paket Shopee, Lazada ku rumah-rumah naruhken pesanen. Sibuka Fesbuk, Istagran, TikTok isina kerina kalak erbinaga, janah enterem ka rusur si ndedahsa, si tentuna ujung-ujungna belanja. Adi siukuri senina Moria, me mbue kal nga keru biaya belanja jaman gundari enda amin gia kita la kutiga? Enda me siniktaken jaman konsumerisme, lanai ngadi-ngadi kalak nukuri la terjeng si ia perlu, tapi ngena-ngena ate, lanai ngukuri janari penukurna. Emaka nggo mbue kalak terjerat pinjaman online, paylater, kredit macet, janah gelah ndarat bas situasi si bage nipu kalak, nipu kade-kade pe lanai meteh mela. Enda man kebiarenta. Em sinigelari kegeluhen si sia-sia. Rubat kita ngayaki si man tadingenken.

Senina Moria, sekali jadi jumpa Tuhan Jesus ras sekalak si rangap i bas pusuhna. Ipindona man Tuhan Jesus gelahna ngerunggui pembagin erta warisenna. Tuhan la terjeng nandai ayonta, terus ku bas pusuhna itandaiNa. Emaka alu tegas itulak Jesus pemindonna e. Engkai? Sabap paksa pemidonna pe la tepat, i bas jelma si enterem. Si peduaken, pemindonna e gelah menyudutken seninana, gelah nggit seninana ngikutken kata Tuhan Jesus si ngkapiti ia. Sipeteluken, tujun kerajan Jesus labo ngayaki ras ngarapken keuntungan secara duniawi arah agama. Tuhan Yesus ras pengajarenNa la njemba alak gelah si saingen ras senina nta pe turangta, tapi iajukNa pe kita ngelepaskan hak-hakta gelah lit kedamen. Kerajan Kristus ibangun ibabo anugerah, perkuah ate ras pengejapen kerna keleng ate Tuhan. Emaka ula pernah ersura-sura meneiken kalak si deban gelah seh sura-suranta. Ola bahan kai pe erpalasken kerangapen, biak konsumerismeta si la mehuli. Jagailah banta, nggelulah alu dem kesadaren, daramilah si tuhu-tuhu, kedamen, ketenengen ras ngena ate Dibata, cukupiNa si perlu man banta.